



前五祖之传道



禅宗起源



昔世尊在灵山会上。拈花示众。是时人天百万。悉皆罔摄。独有金色头陀破颜笑。世尊云。吾有正法眼藏。涅槃妙心。实相无相。微妙法门。不立文字。教外别传。付嘱摩诃迦叶。是为禅宗初祖。



达摩东来



二十八传而至菩提达磨。达摩遵师般若多罗尊者命。来震旦传法。於梁武帝普通七年庚子九月二十一日。浮海达广州。刺史萧昂具礼迎供。表闻武帝。帝迎至京。以语不契机。渡江。止嵩山少林寺。面壁而坐。终日默然。人莫之测。谓之壁观婆罗门。是为禅宗东土初祖。



二十八祖菩提達磨大師



二祖慧可



二十九祖慧可大師

僧神光者。久居伊洛。偏学大小乘义。闻达摩上嵩山。遂往参承。祖常端坐面壁。莫闻诲励。时值大雪。光侍立达旦。积雪过膝。祖悯其诚。留之。易名曰慧可。可问祖。诸佛法印可得闻乎。祖曰。诸佛法印匪从人得。可曰。我心未宁。乞师与安。祖曰将心来与汝安。可良久曰。觅心了不可得。祖曰我与汝安心竟。

祖告慧可。昔如来以正法眼藏付迦叶大士。展转嘱累而至於我。我今付汝。汝当护持。并授汝袈裟以为法信。内传法印。以契证心。外付袈裟。以定宗旨。后代 浇薄。疑虑竞生。云吾西天之人。汝是此方之子。凭何得法。以何证之。倘后难生。但出此衣并吾法偈。用以表明。至吾灭后二百年。衣止不传。法周沙界。明道者 多。行道者少。说理者多。通理者少。听吾偈曰。吾本来兹土。传法救迷情。一花开五叶。结果自然成。吾有楞伽经四卷。亦用付汝。即是如来心地要门。自吾离南 印。来此东土。见赤县神州有大乘气象。遂於逾海越漠。为法求人。际会未谐。如愚若讷。今得汝传授。吾意已终。

三祖僧璨

二祖居少室。有一居士。年逾四十。不言氏名。来设礼。而问祖曰。北弟子身缠风恙。请和尚忏罪。祖曰。将罪来与汝忏。士良久曰。觅罪了不可得。祖曰。与汝忏罪竟。宜依佛法僧住。士曰。今见和尚。已知是僧。未审何名佛法。祖曰是心是佛。是心是法。法佛无二。僧宝亦然。士曰。今日始知罪性不在内。不在外。不在中间。如其心然。佛法无二也。祖深器之。即为剃发。易名僧璨。执持经二载。祖遂嘱累。付以衣法。偈曰。本来缘有地。因地种花生。本来无有种。花亦不会生。



四祖道信

三祖隱於舒之皖公山。有沙弥道信。年始十四。来谒祖曰。愿和尚慈悲。乞与解脱法门。祖曰谁缚汝。曰。无人缚。祖曰。何更求解脱乎。信於言下大悟。服劳九载。后於吉州受戒。祖屡试以玄微。知其缘熟。乃付衣法。偈曰。花种难因地。从地种花生。若无人下种。花地尽无生。



五祖弘忍

四祖往黄梅。道逢一小儿。骨相奇秀。异乎常童。祖问曰。子何姓。答曰。姓即有。不是常姓。祖曰是何姓。答曰是佛姓。祖曰汝无姓耶。答曰性空故无。祖默识其法器。即遣使者至其母所。乞令出家。母以夙缘故。殊无难色。遂舍为弟子。以至付法传衣。偈曰。花种有生性。因地花生生。大缘与性合。当生生不生。

